

TOSHKENT OQSHOMI

№ 14 (14,117) 6 АПРЕЛЬ, ПАЙШАНБА 2023 йил



Газета 1966 йил 1 июлдан чиқа бошлаган

Шаҳар ижтимоий-сиёсий газетаси



vtfo.uz



vtfo_uz@mail.ru



@Toshkent_oqshomi



Toshkent oqshomi



Toshkent Oqshomi_24

Анонс



**ЯНГИ КОНСТИТУЦИЯ
ЁШЛАР НИГОҲИДА**



**ТОШКЕНТДА
ҚУРИЛАЁТГАН
БИНОЛАР
ЗИЛЗИЛАГА
ТАЙЁРМИ?**



ЗУЛМАТГА ЙЎЛ



Жорий йилнинг 5 апрель санасида Президент Шавкат Мирзиёев раислигида “Янги Ўзбекистон” массивларида уй-жой қурилиши ва 2023 йил учун ипотека дастурини амалга ошириш бўйича устувор вазифалар юзасидан видеоселектр бўлиб ўтди. Йиғилишда сўнгги 6 йилда мамлакатимиз аҳолиси 5,5 миллион нафарга ўсганлиги айtilди. Яқин йилларда бу кўрсаткич 40 миллионга етиши қайд этилиб, бу даврда уй-жой билан таъминланганлик даражаси аҳоли жон бошига 18 фоизга ошганлиги қайд этилди. 2022 йилда мамлакатимиз бўйлаб “Янги Ўзбекистон” массивларини қуриш дастури бошланган эди. Селектр давомида эъти-

борсизлик оқибатида фойдаланишга топширилиши кечиктирилаётган уйлар жойлашган вилоят ҳокимларининг қурилиш масалалари бўйича ўринбосарларига ҳайфсан эълон қилинди ва уларга бир ой муҳлат берилди. Шунингдек, 2023 йилда янги уй-жой қуриш ҳажмини 1,5 бараварга ошириб, 90 мингтага етказиш вазифаси қўйилди. Маълумки, Президент ташаббуси билан Тошкент вилоятида “Менинг биринчи уйим” дастури бошланди. Унга кўра, Қурилиш вазирлиги ҳузурида махсус уй-жой компанияси ташкил этилиб, Зангиота туманидан 36 гектар ер майдони ажратилиб, бу ҳудудни комплекс ривожлантириш лойиҳаси ишлаб чиқилади.



Тошкент шаҳар ҳокими в.б. Шавкат Умурзоқов Швейцариянинг «Boschung Group» компанияси бош директори Габриел Бошунг билан учрашди. Учрашувда шаҳар ҳокимининг ўринбосари Ш. Раҳмонов, «Compass Group» компаниясининг вакиллари, «Boschung Group» компаниясининг Ўзбекистондаги дистрибютори Б. Ҳожааҳмедов ва бошқалар иштирок этишди.

«Boschung Group» корхонаси пойтахт йўл инфратузилмаси учун фойдали бўлган махсус коммунал соҳа техникаларини таклиф қилади. Ушбу техник воситалар нафақат катта, балки пиёдалар ва велосипед йўлаклариди ҳам фойдали бўлиши баробарида, тўлиқ электр ёқилғи билан ишлайди. Шу билан бирга, «Boschung Group» компанияси шунчаки ўз маҳсулотини сотишни эмас, балки узоқ муддатли стратегик ва технологик ҳамкорликни мақсад қилганини ҳам маълум қилди.

Ш. Умурзоқов таклиф учун миннатдорлик билдириб, бу масалада компания маҳаллий бозорни ўрганиб, географик ва иқлим жиҳатларни инобатга олиши муҳимлигини айтиб ўтди. Шунингдек, пойтахтимизда ўзаро манфаатли ҳамкорлик учун барча қулай шарт-шароитлар мавжудлигини қайд этди.

Учрашув якунида тарафлар мулоқотни давом эттиришга, ҳамкорлик истиқболларини янада батафсил муҳокама қилишга келишиб олишди.

Шайхонтоҳур тумани ҳокимлиги ташаббуси билан туманда ёшларнинг бандлигини таъминлаш йўналишида ижтимоий лифт яратиш мақсадида “Сотувчилар мактаби” ва “Professional IT” таълими каби лойиҳалар тақдироти ўтказилди.

Тадбирда МФактор жамоаси ҳамда йирик тадбиркорлар иштирок этиб, лойиҳани қўллаб қувватладилар.

Мазкур дастур доирасида ёшлар ва аёллар юқори даромадли, замонавий касбларга ўқитилади ва мақбул ишларга жойлаштирилади.

Дастур нафақат “Сотувчилар мактаби” ва “Professional IT” таълими балки бошқа қатор замонавий ва юқори даромадли касбларга ўргатишни ҳам қамраб олган.

Соғлиқни сақлаш вазирлиги ташаббуси билан юртимиз бўйлаб ўтказилаётган “Саломатлик сайиллари” ойлиги қизгин давом этмоқда.

Ана шундай тадбирларнинг навбатдагиси пойтахтимизнинг **Мирзо Улугбек тумани**даги 7-сон оилавий поликлиникада ташкил этилди.

Унда ҳудудда яшовчи болалар, аёллар, катта ёшли аҳоли вакиллари неврохирург, травматолог, рентгенолог, невропатолог, кардиолог, уролог, педиатр, болалар жарроҳи каби тор соҳа мутахассислари томонидан профилактик тиббий кўрик ҳамда скринингдан ўтказилди.

Чилонзор тумани 4-сектор ҳудудига кирувчи «Меҳржон» маҳалласида сектор раҳбари ўринбосари Ж.Маҳмудов «Меҳржон» маҳалла фуқаролар йиғини раиси Бобур Аматов билан биргаликда ушбу маҳаллада яшовчи фуқаролар учун сайёр қабул ўтказди.

Сайёр қабул жараёнида мурожаатчиларнинг муаммолари ўрганилди ва уларни бартараф этиш чора-тадбирлари белгиланди.



ЯШНОБОДНИНГ ЯШНАМАГАН КЎЧАЛАРИ

Газетамизнинг жорий йил 16 февраль 7-сонидида «ЙЎЛ ТАЪМИРИГА КИМ МАСЪУЛ? Ёки кичик кўчанинг катта ташвишлари» номли чоп этилган мақолада Яшнобод туманида жойлашган 510-сонли МТТнинг кириш дарвозасига олиб борадиган йўлнинг хароб аҳволдалиги ҳақидаги мақолани чоп этиб, бу борада суриштирув ўтказган эдик. Ўз навбатида, мутасадди раҳбарлар жорий йилнинг март ойидан бошлаб, “Обод маҳалла” дастури доирасида юқорида келтирилган йўлда ҳам таъмирлаш ишлари босқичма-босқич амалга оширилишини маълум қилишган эди.



Буни қарангки, кўз очиб-юмгунча, март ойи ҳам ниҳояланиб, апрель ойи ҳам бошланди. Шу сабабли, белгиланган кўчадаги таъмирлаш ишлари билан танишишни мақсад қилдик. Бироқ, тегишли манзилга етиб борганимизда аҳвол ҳанузгача ўша-ўша эканлигига гувоҳ бўлдик. Шу кўча бошидан ҳолатни расмга олаётганимизда бир онахон келиб: “Ҳа болам, нимага расмга олаясан? Кўчани “ремонт” қилади дейишганди. Сен шу “организация”да ишлайсанми”, — дея рус сўзларини аралаштириб сўради. Мен русийзабон онахонга салом бериб, тахририятда фаолият юритишимни, “Тошкент оқшоми” газетасининг муҳбири эканлигимни айтдим. Онахондан ҳам ўзини таништиришини сўраган эдим, аммо журналистлигим уни чўчитдим, нимагадир исми-шарифини ошкор этишни истамади. Лекин шундай бўлса ҳам, уни суҳбатга тортиш мақсадида гапимни давом эттириб, жорий йилнинг бошида шу кўчанинг таъмири яхши эмаслиги ҳақида мурожаат тушганлиги, биз келиб аҳволни ўрганиб, мутасадди ташкилот масъуллари билан боғланганлигимизни ва улар аномал совуқлар тугаганидан сўнг, март ойида кўчада таъмирлаш ишлар бошланишига ваъда беришганлигини айтдим. Мана аномал совуқлар тинчиб, март ойи ҳам якунланди. “Шунга йўллар таъмирланиб, 510-сонли мактабгача таълим ташкилотига фарзандларини олиб келаётган ота-налар таъмирланган кўчаларда қийналмасдан бориб келаётгандир деб келсак, афсуски ҳеч қандай ўзгаришсиз, ёмғир сувлари тўпланган лой кўча ҳанузгача ўзгармаган”, — дедим онахонга.

Мени диққат билан тинглаб турган онахон кинояли кулиб: “Э болам бу каби “ваъдалар”ни кўп эшитдик, лекин бирор-бир ўзгаришни кўрмадик. Яхшиям, кўчанинг бошидаги кўп қаватли уйда бир катакон турар экан, бўлмасам у кўча ҳам худди шундай “ремонтталаб” бўлиб ётармиди”, — деди. Мен онахондан кўп қаватли уйда қайси амалдор яшаши ҳақида сўраганимда: “Билмайман”, — деб жавобни қисқа қилди-да, кетиб қолди. Ушбу берк кўчанинг узунлиги 200 ёки 250 метр чиқади. Хўш... мутасаддиларнинг ўша “каттакон” юрадиган кўчага етган қадами болажонлар ҳар куни юрадиган кўчага етмадими? Ёки бўлмасам, бу кўчанинг харобалигини кўрмай ўтиб кетдимми? Нима ҳам дердик, яна масъуллардан изоҳ кутиб қоламиз...

Зафар НАЗАРОВ тайёрлади



ТОШКЕНТДА ҚУРИЛАЁТГАН БИНОЛАР ЗИЛЗИЛАГА ТАЙЁРМИ?

Сўнгги йилларда юртимизда барча соҳалар сингари қурилиш соҳасида ҳам сезиларли ишлар амалга оширилди. Амалий ташаббуслар натижаси ўлароқ, бино-иншоотлар, ижтимоий соҳа объектлари қад ростлади.

Ўзбекистон Республикаси Қурилиш ва уй-жой коммунал хўжалиги вазирлиги Қурилиш соҳасида ҳудудий назорат инспекцияси билан ҳамкорликда нафақат Тошкент шаҳри, балки бутун Республика бўйлаб ўрганиш ишлари амалга оширилмоқда.

“Соҳада замонавий технологиялардан фойдаланиб, қурилган иншоотлар замон талабига мосми?” “Шаҳарсозлик талабларига жавоб берадими?” каби саволлар шу шаҳарда истиқомат қилаётган барча фуқаролар учун бирдек қизиқ. Айниқса, бутун дунёни ларзага келтирган Туркия ва Суриядаги zilзилалардан сўнг халқимизда бироз қўрқув ҳам борлиги сир эмас.

Бугунги манзилимиз: Тошкент шаҳридаги янги қурилаётган кўп қаватли уйлар.

Илк манзил – Яшнобод тумани, Иззат кўчаси, 58-кўп қаватли иншоот бўлиб, мазкур бинонинг фасад қисмида сувоқ ишлари амалга оширилмоқда. Лекин ишчи гуруҳ томонидан ўқдан кўчиш ҳолати яъни бинонинг бир тарафга қийшайиши, бетон сувоқнинг сифатсизлиги, қурилиш майдонининг тоза эмаслиги ҳолатлари аниқланди. Ҳатто гишт теришда ҳам хатоликларга йўл қўйилганлиги, ачинарли ҳол. Объектда ўрнатилган устунларнинг ҳар хил ўлчамда эканлигини келажакда бу уйда яшайдиганлар билармикан? Уларнинг тақдири қурилиш ишларига бош-қош бўлганларга бир чақалик бўлсада қадрлимикан?... Бу ҳам етмагандек, устаси фаранглар умумий лойиҳадан четга чиқиб кетган.

Кўп қаватли уйларни қуришда бетон плиталарнинг аҳамияти катта. Улар қанчалик мустаҳкам бўлса, бинонинг zilзилабардошлиги ҳам шунчалик юқори бўлади. Ўрганиш ишлари давомида Иззат кўчасида жойлашган бетон плиталар қуйиш майдонида ҳам кўплаб камчиликлар аниқланди. Темир арматураларни мустаҳкамлашда уларни қиздириш талаб этилади. Уланиш мумкин бўлмаган қисмларда ҳам темир арматуралар бир-бирига уланган ва қиздирилмаганлиги аниқланди. Йўл қўйилган хатоларни ҳисобга олган ҳолда ушбу бетон плита ишлаб чиқарувчи заводнинг фаолиятини тўхтатиш мақсадида лицензиясини бекор қилиш бўйича тақдимнома юборилиши айтиб ўтилди. Ишлаб чиқарилган сифатсиз плиталарнинг ҳам фойдаланилмаслиги учун чоралар кўрилди.

Маълумот ўрнида, аниқланган камчиликларни ўз вақтида бартараф этмаслик Ўзбекистон Республикаси Маъмурий Кодексининг 99-моддаси 1-қисмига биноан маъмурий жазо қўллашга олиб келади. Унга кўра, 99-модда Шаҳарсозлик тўғрисидаги қонунчиликни бузиш деб номланади. Лойиҳалаш, қурилиш-монтаж ишлари бажарилаётганда талабларни бузиш, шунингдек, қурилиш соҳасида назорат қилиш ва йўл-қурилиш ишлари сифатини назорат қилиш инспекцияларининг кўрсатмаларини бажаришдан бўйин товлаш ёки ўз вақтида бажармаслик (бундан яқка тартибдаги уй-жой қурилиш объектлари мустасно) базавий ҳисоблаш миқдорининг 5 баробардан 10 баробаригача, мансабдор шахсларга эса – 10 баробардан 20 баробаригача миқдорда жарима солишга сабаб бўлади.

Айнан шу модданинг 2-қисмига кўра, худди шундай ҳуқуқбузарлик маъмурий жазо чораси қўлланилганидан кейин бир йил давомида тақрор содир этиладиган бўлса, фуқароларга базавий ҳисоблаш миқдорининг 10 баробаридан 15 баробаригача, мансабдор шахсларга эса – 20 баробардан 30 баробаригача миқдорда жарима солишга сабаб бўлади.

Юқорида биз кўрган биргина кўп қаватли уйнинг қурилишида талайгина камчиликларнинг мавжудлиги кишини хавотирга солади. Айниқса, сўнгги пайтларда юртимизда ва кўшни давлатларда бўлаётган zilзилалар барчамизда табиий саволни келтириб чиқаради: Ўзбекистон zilзилага тайёрми?

Ўзбекистон Республикаси Президентининг 2022 йил 30 майдаги 144-сонли “Ўзбекистон Республикасининг сейсмик хавфсизлигини таъминлаш тизимини янада такомиллаштириш чоратadbирлари тўғрисида”ги Фармони асосида аҳоли ҳамда ҳудуднинг сейсмик хавфсизлигини таъминлаш тизимини 2025 йилгача такомиллаштириш назарда тутилган. Унга илова тарзида мамлакатимизда мавжуд сейсмологик қуйидаги камчиликлар аниқланган:

- Сейсмик кузатувлар тармоғи тўлиқ автоматлаштирилмаган;
- Сейсмик кузатувлар тармоғи халқаро мониторинг тармоқларига тўлиқ интеграция қилинмаган;
- Мавжуд станцияларнинг аксарият қисми халқаро стандартларга мос келмайди;
- Республика ҳудудини тўлиқ мониторинг қилиш кўрсаткичи паст;
- 14 та станция шаҳарлар марказида жойлашган бўлиб, бу ҳудудларда халақит қилувчи тўлқинлар даражаси юқори ҳисобланади.

Ушбу Фармон ижроси доирасида республика ҳудудидаги кўп квартиралли уй-жойларни йиллар кесимида zilзилабардошлик бўйича хатловдан ўтказиш амалиёти йўлга қўйилиши белгиланган. Хатлов натижасига кўра эксплуатация муддатини ўтаб бўлган сейсмик заиф ва авария аломатлари аниқланган кўп квартиралли уй-жойлар ўрнида босқичма-босқич янги уй-жойлар қуриш бўйича таклифлар маҳаллий давлат ҳокимияти органларига киритилади. Шунингдек, 2023 йил 1 августгача сейсмик фаол зоналарда жойлашган бино ва иншоотлар майдонининг zilзилалар оқибатида деформацияси, силжиши, чуқиши каби омилларни аниқлашга мўлжалланган радиолокацион космик мониторинг тизими яратилади.



Карим Зокировнинг ўғли



Инсон умри давомида ўзи билиб-билмай ҳаёт майдонидаги ўрнини мустақамлашга, уни ўзгалар учун таассуротларга тўлдиришга уриниши сир эмас... бу йўл машаққатини ҳар ким ўз тарозисидида ўлчайди. Ўзбекистонда хизмат кўрсатган артист Жамшид Зокировнинг ҳаёт йўли эзгу ниятлар билан ҳамоҳанг кечди, десак хато бўлмайди. Эсимда, бу одамнинг юзида ҳамиша ним табассум бўларди. Ҳеч қачон ҳеч кимни бегона билмаган санъаткор чеҳрасида доим камтарликни кўрардим... “Жамшид Зокиров вафот этибди...” бу хабарни эшитганимда “Нима учун?!” деган савол фикримда қаттиқ туриб олганди. Гўёки яхши одамларнинг бу дунёни тарк этиши адолатсизликдек туюлганди... Жамшид Зокировнинг бу дунёни тарк этганига ҳам эртага ўн бир йил бўлади.

Жамшид Зокиров 1948 йил 11 июлда Тошкент шаҳрида туғилган. Машҳур Зокировлар сулоласининг вакили бўлган Жамшид аканинг келажаги албатта санъат билан боғлианиши шарт эди гўё... Ўзбекистон халқ артисти Карим Зокировнинг санъатга нисбатан ҳурмати, ўзига хос эътиқоди таъсирида улғайган фарзандлар ўзбек санъати ривожига ўзининг муносиб улушларини қўшди.

1967 – 1971 йилларда ҳозирги Ўзбекистон санъат ва маданият институтининг кино ва театр актёрлиги бўлимида ўқиган. Институтда Ёдгор Саъдиев, Ойбарчин Бакирова, Марат Азимов, Саидкомил Умаров каби халқимизнинг севимли санъаткорлари билан бирга таҳсил олган Жамшид Зокиров умри давомида улар билан ёнма – ён ишлади. Жамшид Зокиров фаолияти давомида қатор спектаклларда, бадиий фильмларда ўзига хос образларни яратди. Экрандаги “Темир хотин”даги Олимтой, “Келинлар қўзғолони”даги ўғил образларида актёр юмористик характерини муносиб кўрсатган бўлса, кўп қисмли “Шайтанат” фильмида ўзига хос мураккаб образи билан томошабин меҳрини қозонди. Театрда эса актёр кўплаб турфа хил образлари билан ўзбек саҳна санъати ривожига улуш қўшди. Жамшид Зокиров 2012 йилнинг 7 апрелида 63 ёшида саратон хасталиги сабаб оламдан ўтди. Агар ҳаёт бўлганиларида, бу йил 75 ёшни қарши оларди.



Ўзбекистон халқ аристи Эркин КОМИЛОВ:

— Шундай одамлар бор, улар ҳақида ҳар қанча яхши гап айтсанг оздек туюлаверади... Жамшид ҳақида ҳам худди шундай фикр айтиш мумкин. У, аввало, чин инсон, яхши дўст эди. Назаримда, у санъат учун туғилгандек эди... Саҳнада шундай енгил ҳаракат қилардики, ҳеч бир қадами бежиз қўйилмасди. Ижросида хоҳ комедия, хоҳ драма, хоҳ фожиа ўзининг авж нуқтасига етарди. Биз кинода охириги марта “Сув ёқалаб” фильмида бирга ишладик. Эсланг, унинг ижросидаги миробнинг тақдири у қадар узоқ бўлмаган дақиқаларда қандай ечим топади... Жамшид Зокиров чинакам истеъдод эгаси эди. Унинг рақсларини кўрган одам мафтун бўларди. “Дилхирож”дан “Тановар”гача у мусиқанинг ҳар бир оҳангини қалбан ҳис этиб, ўзига хос дард, қувонч билан ўйнардди... Пазанда, ишбилармон йигит эди... Умрининг сўнгги кунларида рафиқам билан уни йўқлаб бордик. Кўзлари кўз олдимда қолди... Нима дейишни билмай “Жамшид туш кўрдим, сен оқ отда юрибсан... Энди худо хоҳласа тузалиб кетасан”, дедим. Гавҳар менга қараб кўйди... Аслида, мен ўша тушни кўрмагандим, шунчаки, чин дилдан уни ростдан ҳам тезроқ тузалиб, яна аввалгидек сафимизга қайтишини истагандим...



Жамшид Зокировнинг акаси — Фаррух ЗОКИРОВ:

- Оиламизда беш ўғил ва битта қиз Луиза опам... Жамшид билан бошқа жигарларимдан кўра яқин эдим, сирдошим эди. Кўқонга кўп борардик, шунда қариндошлар, отамни билганлар "Карим ака шу Жамшидингиз сизга ўхшайди, жуда бошқача-да шу ўғлингиз", дейишарди. Эшитиб, баъзида рашким ҳам келарди. Лекин у умрининг охиригача Жамшид Карим Зокирийнинг ҳақиқий ўғли, деган эътирофга муносиб яшади. Ростдан ҳам у отамга ўхшарди, меҳрибон, ҳамманинг кўнглига қарарди. Унинг истараси иссиқ эди. Худо берган бошқача файзи бор эди... Бугун менга унинг меҳри етмайди, унинг ўрни ҳаммадан кўпроқ билинади. Укамнинг руҳлари шод бўлсин.

**Гавҳар ЗОКИРОВА — Жамшид Зокировнинг рафиқаси:**

— 1971 йилнинг баҳори... Ўшанда қайнотам касалхонада эди. Бетоблиги туфайли ховотир биланми бизни тезроқ расмий никоҳдан ўтишимизни истаган. Иккимиз ҳам ёш эдик... У пайтларда чиройли бахт уйлари йўқ, Сергелидаги кичкина ФХДЁда никоҳимиз қайд этилган эди. Луиза опамнинг турмуш ўртоғи Пўлат ака гармончини олиб келганини ҳам эслаймиз. Йўл бўйи пиёда гармон оҳанглари билан келганмиз. Жамшид акам "Одамлар русларнинг тўйи бўлаяпти деб ўйлаяпти, нимага гармончини олиб келибди", дея бир неча бор гапирган. Шу кетишда

кўргандик. Фатани юзимга ташлаб, келинсалом қилганим эсимда. "Хурсандман болаларим, бахтли бўлинглар", деб қайнотам дуо қилганди. Кейин бизни Науфал ака дастурхонга таклиф қилган. Ўшанда илк бор Ботир акамни кўрганман. Оқ костюм-шимда келиб, бизга бахт тилаган эди. Ҳаётнинг менга берган туҳфалари кўп. Шуларнинг орасида энг қадрлиси, шубҳасиз, турмуш ўртоғимнинг муҳаббати эди. Умримни шундай бағрикенг инсон билан яшаганимдан, унинг хотираси билан бугун бахтиёр эканимдан Яратганга шукр айтаман. Мен баъзан нималардандир норози бўлардим, эътирозларим бор эди. Лекин умр йўлдошим ҳеч қачон оғринмасди. Кимгадир ёрдам берса, нимагадир қайғурса "қўйинг, сизга нима", деган пайтларим бўлган. Шунда Жамшид ака

"Тули қўй, ахир қўлимдан келаяптику, менга қийинмас", дерди. Гапимдан уялиб қолардим... Мен улардан кўп нарсани ўргандим. Ёмон бўлиш осон, йўқ, деган сўзни айтиш қийин эмас. Яхши бўлиш, одамларга беминнат меҳр бериш бу меҳнат. Умрининг сўнги кунлари... Эсласам, юрагим эзилиб кетади. Бир куни Жамшид акам бемор ётган жойларида "Тули Ёқуб акага айтинг, мен бугун спектакль ўйнай олмайман", деди... тўкилиб кетдим...

Лекин "хўп", дедим-у, ташқарига чиқдим. Ҳеч кимга ҳеч нарса деёлмасдим... Тақдирни қаранг ўша куни Ёқуб ака Аҳмедов телефон қилди: "Қадрдонларим қалайсиз?"... Мен Жамшид акамнинг гапларини айтдим... "Тули бир театрга олиб келмайсанми?", дедилар. "Йўқ, энди кеч... Одамлар кўз ўнгида Жамшид акамнинг қиёфаси аввалгидек қолишини истайман", дедим...

Театрга иш юзасидан бордим. Аммо учрашув белгиланган одам белгиланган вақтга келмади. Кетган вақтимга ачиниб, асабийлашиб турсам, театр фоесидида Жамшид ака пайдо бўлди. "Ассалому алайкум, Жамшид ака", дедим. Саломимга ўша қадрдон табассум билан алик олиб "Ҳа, қизим нима бўлди", деб сўради. Имкон қадар вазиятни сездимасликка уриндим. Жамшид ака бошқа ҳеч нарса сўрамади, лекин "Ҳар бир вазиятдан яхшилик топиш керак. Бунақа ҳолатлар иш фаолиятинг давомида ҳали кўп бўлади. Ўша одамнинг иши чиқиб қолгандир, балки ноқулай вазиятга тушиб қолгандир... Сен хафа бўлма...", деди. Шу тасалли кўнглимдаги ғашликни тарқатиб юборганди... Бугун бу инсон орамизда йўқ. Лекин Жамшид Зокировни билган, таниган ёки у ҳақда нимадир эшитганлар қалбида яшаяпти... Ўша ширин сўзи, қадрдон табассуми ва камтарона қиёфаси кўз ўнгимизда...



касалхонага бориб, қайнотамни

Оилавий муносабатларда Жамшид Зокиров ўзига хос бўлган "самимий принцип"га эга эди. Муҳаббат, ака - укаларнинг ўзаро оқибати, оилага, турмуш ўртоққа нисбатан самимий меҳр бу инсон учун оддий ва одатий қоидага айлангандек...

Театрда ҳамisha турмуш ўртоғи Гавҳар опа билан билан бирга кўрардим. Тўғриси, бу жуфтликни алоҳида-алоҳида тасаввур қилишнинг иложи йўқдек эди...

Уларнинг ўртасидаги муҳаббат риштаси талабалик кезлари боғланган эди. 1971 йилнинг 9 май санасида Жамшид ака Гавҳар опа билан умр йўллари боғлади. Уларнинг бир ўғил, бир қизи бор. Жавоҳир Зокиров актёр, Оҳиста Зокирова санъатшунос, хонанда

**Жавоҳир ЗОКИРОВ — Жамшид Зокировнинг ўғли**

Ҳар бир фарзанд учун отаси ҳамisha азиз ва қадрли бўлади. Айниқса, ўғил бола илк бора отасига тақлид қилади. Мен ҳам болалигимда худди адамга ўхшаб гапиришни, кийинишни истардим... Ота-онамни доим бирга кўриб ўрганганман. Болалигимдан уларни ҳеч қачон айро тасаввур қила олмасдим. Ишда ҳам, уйда ҳам, меҳмондорчиликларда, ижодий учрашувларда улар бир – бирини қўллаб – қувватлашарди. Шу қадрлар мен учун ниҳоятда қадрли... Жамшид Зокиров халқ кўз ўнгида маҳоратли актёр, яхши одам сифатида гавдаланади. Менинг қалбимда, нигоҳимда бу инсон аввало, дунёдаги энг яхши, бағрикенг, меҳрибон ОТА сифатида из қолдирган. Танбехларида ҳам меҳрини сезиш қийин эмас. Илк бора сигарета чекканимда жуда қаттиқ урушганди...

"Болалар" гуруҳи жуда машҳур бўлган кезларида отам менга Москвага ўқишга борасан, деди. Қандай қилиб шундай пайтда кетиш мумкин? Машҳурмиз, кунда-кунора концертлар, топишимиз ҳам яхши. Нима учун мен ҳаммасини ташлаб ўқишга кетишим керак, деган исёнлар бўлган менда... Ота-онам мажбурлаб Москвага санъат сирларини профессионал ўрганишим учун жўнатди. Жуда хафа бўлганман... Лекин энди тушундимки, ўша пайтларда яхши ҳам шу ишга мени мажбурлашгани! Ҳозир актёр сифатида нимагадир эришган бўлсам, ота-онамнинг ҳиссаси катта. Мен отамга ўхшамайман, улардек сабрли, ҳокисор бўлолмайман. Жиззакироқман... "Жавоҳир Карим Зокирийнинг набираси, Жамшид Зокировнинг ўғли", деган эътироф мен учун ниҳоятда азиз.



Янги Конституция Ёшлар Нигоҳида

Сайёрамизнинг эртанги куни, фаровонлиги фарзандларимиз қандай инсон бўлиб камолга етиши билан боғлиқ.

Бизнинг асосий вазифамиз – ёшларнинг ўз салоҳиятини намойён қилиши учун зарур шароитлар яратишдан иборат.

Ўзбекистон Республикаси Президенти Шавкат Мирзиёев
БМТ Бош Ассамблеясининг 72-сессиясида сўзлаган нутқидан

Мамлакатимизда қонун устуворлиги йўлида амалга оширилаётган энг катта ислоҳот бу референдумдир. Бугунги кунда ушбу тарихий тадбирни кўтаринки кайфиятда ўтказиши мақсадида юртимиз бўйлаб тарғибот тадбирлари ўтказилмоқда. Ушбу тадбирлар аҳолининг деярли барча қатламини қамраб олди. Хусусан, жамиятнинг энг илгор қатлами бўлган ёшлар ҳам бу масалада ўз сўзини айта оляпти. Бугунги суҳбатдошларимиз ўтқир зеҳли, билимга чанқоқ талаба-ёшлардир.



Тожибоев ОЛЛОЁР, Жамоат хавфсизлиги университети талабаси, Ҳарбий олий таълим муассасалари тарғиботчиси:

— Мамлакатимизда амалга оширилаётган конституциявий ислоҳотлар давомида биз талабалар референдум олди тарғибот тадбирларида фаол иштирок этишни мақсад қилиб қўйдик. Ўзгартириш киритилаётган айрим нормалар бизнинг ҳам эътиборимизни тортди. Мисол учун, янги таҳрирдаги Конституциянинг 19-моддаси: “Инсон ҳуқуқ ва эркинликлари унга туғилгандан бошлаб тегишли бўлади”. Ушбу норма “Инсон ҳуқуқлари умумжаҳон декларацияси”нинг 1-моддасида келтириб ўтилган. «Халқаро ҳуқуқий ҳужжатда айтиш мазмундаги модда бўла туриб нега Конституцияга ҳам киритилмапти?» — деган савол туғилиши табиий. Демак, янги таҳрирдаги Конституциянинг 15-моддасига назар соладиган бўлсак, “Ўзбекистон Республикаси Конституцияси олий юридик кучга эга ва тўғридан-тўғри амал қилади”. Халқаро ҳуқуқнинг умумэтироф этилган нормалари мамлакатимизда тўғридан-тўғри кучга кириши учун ушбу моддалар жорий қилинмоқда. Инсон туғилганидан бошлаб унга тегишли бўлган табиий ва ажралмас ҳуқуқлар сирасига инсон ҳаёти, шаъни, қадр-қиммати, озодлиги, тенглиги, эркин бўлиши, хавфсизлиги, дахлсизлиги кабилар қиради. Бу ҳуқуқлар қонунларда белгиланганлиги ёки белгиланмаганлигидан қатъи назар инсонга азалий тегишлидир, деб эътироф этилади. Инсон ҳуқуқ ва эркинликлари ҳар кимга туғилганидан бошлаб тегишли бўлиши, Ўзбекистон иштирокчиси бўлган инсон ҳуқуқларига оид 80 га яқин халқаро ҳужжатларда ҳам белгиланган. Айтиш мумкин, мақсадда Конституциямизга киритилаётган муҳим модда инсоннинг фундаментал ва ажралмас ҳуқуқларини таъминлаш давлатнинг асосий вазифаси эканлигини, мазкур ҳуқуқларга эгаллик қилиш учун бирор-бир расмийлаштирилмас кафолатлигини аниқлатади. Эътиборимни тортган яна бир модда янги таҳрирдаги Конституциянинг 27-моддаси: “Шахс суднинг қарорисиз 48 соатдан ортиқ муддат ушлаб турилиши мумкин эмас”. Ушбу норма жиноят процессуал қонунчилигида ҳам мавжуд ва бу айрим ҳуқуқшуносларда: «Амалдаги қонунчиликда бўла туриб нега Конституцияга ҳам киритилмоқда?» — деган саволни юзага келтирмоқда. Юқорида айтилганидек, Конституциявий норма тўғридан-тўғри амал қилади. Инсон ҳуқуқларининг поймол бўлишининг олдини олиш мақсадида ушбу ҳуқуқ Конституция билан мустақамланиб қўйилмоқда. Бунга кўра, шахс

жиноятда гумон қилиниб, қўлга олинганда қонуний равишда текширув ва тергов ишлари ўтказилади. Агарда унинг айби қонуний ва асосли равишда суд қарори билан тасдиқланмаса, 48 соатдан сўнг ҳеч қандай вазаларсиз қўйиб юборилиши шарт. Эътибор қаратадиган яна бир муҳим жиҳат, аҳоли учун Конституция унинг ҳуқуқ ва эркинликларини ҳимоя қиладиган асосий ҳужжат бўлиши билан бирга Кодекслардан фарқли ўлароқ халққа яқин яъни тушунилиши осон бўлган ҳужжат ҳамдир. Бир сўз билан айтганда, янги таҳрирдаги Конституцияда инсон, давлат, жамият принциплари мужассам. Инсон қадрли сиёсат даражасига кўтарилган бир пайтда ушбу муҳим тарихий референдум халқнинг хоҳиш-истакларини ўзида жамлаган деб айта оламиз.



Аҳмад БЕРДИМУРОДОВ, Жамоат хавфсизлиги университети талабаси:

— “Янги таҳрирдаги Конституциянинг ёшлар масалаларига оид бўлган 79-моддаси эътиборимни тортди: “Давлат ёшларнинг шахсий, сиёсий, иқтисодий, ижтимоий, маданий, экологик ҳуқуқлари ҳимоя қилинишини таъминлайди. Уларнинг жамият ва давлат ҳаётида фаол иштирок этишини рағбатлантиради”.

Ушбу норманинг киритилиши мамлакатимизда амалга оширилаётган ёшларга оид давлат сиёсатини Конституция даражасига олиб чиқиб қўйди. Президентимиз Шавкат Мирзиёевнинг 2022 йил 20 декабрдаги Халққа ва Олий мажлисга йўллаган мурожаатномасида ҳам таълим, инсон ҳуқуқлари, ёшларга эътибор соҳаларида муҳим масалалар кўрсатиб берилди. 2022-2026 йилларга мўлжалланган “Тараққиёт стратегияси”нинг 46, 47, 48 мақсадларида ҳам ёшларга оид давлат сиёсатини юқори даражада ривожлантириш ишлари кўзда тутилган. Давлат ёшларни интеллектуал, ижодий, жисмоний ва ахлоқий жиҳатларини шаклланишини ҳам қўллаб-қувватлайди. Шу билан биргаликда, ёшларга ғамхўрлик қилиш давлат ва жамият мажбурияти сифатида қаралади.

Турли вазиятларда инсонларда баъзида юридик ёрдам олишда ҳар хил қийинчиликлар юзага келади. Шу қийинчиликларни бартараф этиш мақсадида адвокатлик институтини ривожлантиришга алоҳида эътибор қаратилмоқда. Бизга маълумки, амалдаги Конституцияда Прокуратура ва суд тизимлари учун алоҳида боблар мавжуд. Лекин адолат ҳимоячиси



бўлган адвокатлар ҳақида ҳеч қандай норма йўқ эди. Ҳуқуқий давлатдан фуқаролик жамиятига ўтишда адвокатлик институтининг роли муҳим. Бу модданинг киритилиши халқимизнинг ҳуқуқий онг ва тафаккурини, ҳуқуқий маданиятини оширишга хизмат қилади. Амалдаги қонунчиликда қонун олдида ҳамма тенг эканлиги кўрсатиб ўтилган. Лекин, фуқаролар ўз ҳақ-ҳуқуқларини талаб қилиш учун ҳам давлат айбловини қўлловчи прокуратурага бориб, мурожаат қилишган. Ваҳоланки, фуқаронинг ҳуқуқларини ҳимоя қилувчи ташкилот бу — адвокатура ҳисобланади. Тўғри, прокуратура ҳам қонунийликнинг бир хилда амал қилинишини назорат қилувчи ташкилот ҳисобланади. Лекин прокуратуранинг асосий вазифаси давлат айбловини қўллашдир. Аҳолиси 36 миллиондан ошаётган Ўзбекистонда 4500 га яқин адвокатнинг фаолият юритиши паст кўрсаткич ҳисобланади. Баъзи мамлакатларда ҳатто 8-10 кишига битта адвокатнинг тўғри келиши кузатилаётган бир пайтда адвокатларга эҳтиёжнинг яққол сезилаётганини кўраемиз.

Ҳар қандай шахс ҳуқуқни муҳофаза қилиш органлари томонида қўлга олинганда ёки ҳуқуқни муҳофаза қилувчи ташкилотларга чақирилганда бироз ўзини йўқотиб қўйиши, стрессга тушиш ҳолатлари кузатилиши бор гап. Бундай вазиятларда фуқаронинг ҳуқуқларини ҳимоя қилиш учун адвокат ёрдамини таъминлаш муҳим ўрин тутди. Бундай вазиятларда адвокат шахсга кўмакчи сифатида юридик ёрдам бериши ҳуқуқий маданиятнинг энг юқори бўғини деб кўрсатилган”.

— Янги таҳрирдаги Конституцияда суриштирув, тергов ва суд жараёнида инсон ҳуқуқларига оид 9 та энг муҳим кафолатлар:

Шахсни ушлаш чоғида унга тушунарли тилда унинг ҳуқуқлари ва ушлаб турилиши асослари тушунтирилиши шарт.

Шахс ўзининг айбсизлигини исботлаши шарт эмас ва исталган вақтда сукут сақлаш ҳуқуқидан фойдаланиши мумкин.

Айбдорликка оид барча шубҳалар гумон қилинувчи, айбланувчи, судланувчи ёки маҳкумнинг фойдасига ҳал қилиниши керак.

Агар шахснинг ўзига қарши ягона далил бўлса, у айбдор деб топилиши ёки жазога тортилиши мумкин эмас. Шахс ўзига ёки яқин қариндошларига қарши гувоҳлик беришга мажбур эмас. Шахс суднинг қарорисиз 48 соатдан ортиқ муддат ушлаб турилиши мумкин эмас. Ҳибсга олиш, қамоққа олиш ва қамоқда сақлашга фақат суднинг қарорига кўра йўл қўйилади.

Ёзишмалар, телефон орқали сўзлашувлар, почта, электрон ва бошқа хабарлар сир сақланишини чеклашга ҳамда уй-жойда тинтув ўтказишга фақат қонунга мувофиқ фақат суднинг қарорига асосан йўл қўйилади.

Ҳар бир фуқаронинг малакали юридик ёрдам олиш ҳуқуқи кафолатланади. Қонунда назарда тутилган ҳолларда юридик ёрдам давлат ҳисобидан кўрсатилади.

Умида ҲАҚБЕРДИЕВА
тайёрлади





ЗУЛМАТГА ЙЎЛ

Гиёҳвандлик одамнинг ички органларини зарарлайди, юрак фаолиятини издан чиқаради. Бунинг оқибати ўлимга олиб боради. Қарамлик гиёҳвандликнинг ғалабаси. Бугун сайёрамизда кимёвий ва психотроп моддаларга муккасидан кетганлар, афсуски, жуда кўп.

Гиёҳвандлик – сайёранинг мушкул муаммоси. Унинг домига тушган борки, йўлини йўқотади, орини, борини сотади. Бу шундай фожиаки, уни одамлар ўз қўллари билан “ясайди”, бузилган тафаккури билан тарғиб этади.

Замоннинг зайли билан бу балонинг турлари кўпайди, турмушимизда бу офат янги ном ва кўринишларда жуда тез суратларда пайдо бўлмоқда. Ачинарлиси, мутахассис ва масъуллар унинг зарарли ёки ноқонунийлигини исботлагунча юзлаб одамлар қора дорининг қарамига айланиб улгуряпти.

Дунё миқёсида наркомания билан боғлиқ статистик маълумотлар бизни сергакликка чақиради. Бирлашган Миллатлар Ташкилотининг Наркотиклар ва жиноятчилик бўйича бошқармасининг 2022 йилги ҳисоботида 2020 йилда дунё бўйлаб 15 ёшдан 64 ёшгача бўлган 284 миллионга яқин одам гиёҳванд моддаларни истеъмол қилгани маълум бўлди. Ҳисоботда айтилишича, 2010 йилдан то 2022 йилгача глобал гиёҳванд моддалар истеъмол қилиш 26 фоизга ортган. Шунингдек, 15-20 ёшда гиёҳванд моддалардан фойдаланишни бошлаганларнинг кўпчилиги ўттиз ёшга ҳам етиб бормайди...

Европа мамлакатлари орасида Россия гиёҳванд моддалар истеъмол қилувчилар сони бўйича етакчилардан бўлиб қолмоқда. Мамлакатда 6 миллионга яқин гиёҳванд рўйхатга олинган бўлиб, 13 ёшдан 16 ёшгача бўлган ўсмирлар орасида ўғил болаларнинг 40 фоизи, қизларнинг

16 фоизи вақти-вақти билан ёки мунтазам равишда гиёҳванд моддаларни истеъмол қилишда давом этмоқда. Бундан ташқари, мамлакат маҳбусларининг 25 фоизи гиёҳванд моддалар билан айбланган одамлардир.

Юқоридаги рақамлар аниқлангани холос. Яна минглаб рўйхатга олинмаган гиёҳвандлар бор. Сабаби, уларнинг кўпчилиги ўз муаммоларини бошқалар билишини хоҳламайди ва энг оғир ҳолатдагина уларнинг гиёҳвандлиги маълум бўлади. Даволанишни хоҳлайдиган беморларнинг кўпчилиги эса иш, ўқиш ва турмуш қуришда муаммоларга дуч келмаслик учун ҳам “дардини” яширади. Шу боис жиноят содир этмаган, давлат тиббиёт муассасаларида ҳисобда турмайдиган гиёҳвандлар статистикадан четда қолмоқда. Бундан ташқари, хусусий клиникаларда даволанаётган

гиёҳвандлар ҳақидаги маълумотларнинг ҳаммаси ҳам давлат идораларига тақдим қилинмайди.

Пандемия туфайли жаҳон мамлакатлари иқтисодиётининг деярли барча тармоқлари зарар кўрди. Бироқ бу ҳолат гиёҳванд моддалар савдогарларига савдо ҳажмини сезиларли даражада ошириш имконини берди. Афсуски... Иш ўринларининг қисқариши, асабийлик, масофавий таълим туфайли ёшларнинг тартибсиз билим олиш жараёни, қора дори савдоси орқали даромад олишга уриниш ва шу каби ҳолатлар гиёҳванд моддалар савдосининг бозорини янада “чаққон” қилди.

Афсуски, юртимизда ҳам шу йўл билан кун кўрувчилар, даромад топувчилар бор. Тошкент шаҳар Божхона Бошқармаси ахборот хизмати раҳбари Отабек Одиловнинг хабар беришича, Бошқарма томонидан ҳуқуқни муҳофаза қилувчи органлар билан ҳамкорликда ўтган 2022 йилда гиёҳванд воситаларининг ноқонуний муомаласига қарши кураш бўлими томонидан 13 кг. 960 грамм гиёҳвандлик воситалари, 290 дона психотроп моддаларнинг ноқонуний айланмасига чек қўйилган.



РИНИАТМ Тошкент филиали, олий тоифали психотерапевт, нарколог Абдуҷамшид ПЎЛАТОВ:

- Гиёҳванд ва психотроп моддаларга қарамликни икки турга бўлиш мумкин. Биринчиси жисмоний қарамлик бўлиб, бу модда турига қараб баданда оғриқлар сезиш, ич кетиши, безгак, кўз ёшланиши каби ҳолатлар билан кечади. Агар вақтида тиббий муолажалар қўлланилса, оғриқлар уч кундан йигирма кунгача давом этади. Иккинчиси руҳий қарамлик бўлиб, жуда оғир ҳолатда кечади. Бемор билан психологик мулоқот қилинса, гиёҳванд моддаларнинг салбий оқибатлари тушунтирилса, даволаниш уч йилдан беш йилгача давом этади. Бизда бу кўрсаткичлар беморнинг реабилитацион салоҳиятига қараб белгиланади. Агар бемор аввалдан руҳий касал ёки, ОИВ, сил касалликлари билан оғриган бўлса, бу беморларнинг реабилитацион салоҳияти паст деб топилади ва уларнинг соғайиш эҳтимоли жуда паст. Бу дегани соғлом одам учун гиёҳванд моддалар ёки психотроп моддалар истеъмоли зиёнсиз дегани эмас. Ушбу моддалар ҳар қандай соғлом одамни ўлимга олиб боради. Дориларнинг таъсирини икки турга бўлиш мумкин. Биринчиси жисмоний таъсир бўлиб, инсоннинг ички органлари фаолияти, насли ва жинсий физиологияси бузилишига олиб келади. Иккинчиси руҳий таъсир ҳисобланиб, инсоннинг деградация ҳолатига тушиб қолиши яъни, интеллектуал қобилиятининг пасайиши, ривожланиш истагининг йўқолиши, кўпол қилиб айтганда гиёҳванд моддаларнинг қулига айланиб қолиши билан юз беради.



РИНИАТМ Тошкент филиалида даволанаётган бемор Ҳ. И.

- Гиёҳванд моддаларни истеъмол қилишни неча ёшда бошлагансиз? Бу ҳолатга тушишингиздан аввал қандай иш билан шуғуллангансиз?

- Ёшим ўттиз иккида, йигирма саккиз ёшларимдан синтетик дориларни истеъмол қилишни бошладим. “Малика” савдо марказида савдо-сотик билан шуғулланганман.

- Сизни нима мажбур қилди?

- Шунчаки қизиқиш билан шу ҳолга тушиб қолдим. Нимадир мажбур қилди деёлмайман.

- Бу фожиага ким айбдор?

- Ҳамма нарсага одамнинг ўзи айбдор бўлади. Агар хоҳламаса, атрофдагилар уларни мажбур қила олишмайди.

- Шифо топишингизга ишонасизми?

- Ҳа албатта, инсоннинг ўзига боғлиқ. Ташлайман деган одам ташлайди.

- Бу дарддан қутулмоқчи бўлганларга нима деган бўлардингиз?

- Оиласига қараб хулоса чиқариб, нима мақсадда яшайман, ота-онам нима мақсадда мени катта қилишди, деган саволларни ўзига бериши керак.

- Оилангиз, фарзандларингиз борми?

- Ҳа, аёлим, фарзандларим бор.

- Сизнинг ҳолатингиз уларни руҳиятига қай даражада таъсир қилди?

- Бу оғир ҳолат... жамиятда ҳам, оилада ҳам сизга бўлган қарашлар ўзгаради. Оилангизда хурсандчилик кайфият йўқолади. Хурматингиз қолмайди, ҳатто болаларингиз саволингизга савол билан жавоб беришади.

- Наркотиклар берган лаззатни ҳалол нарсалардан топиш мумкинми?

- Хонадонингизга ноз-неъматлар олиб келиш, оилангиз билан хурсанд кайфиятда бир дастурхонда баҳам кўриш энг лаззатлиси, менимча. Бошқа лаззат йўқ деб ўйлайман.

- Агар яна синтетик моддаларни таклиф қилишса...

- Йўқ, бу балога қайтиш ниятим йўқ. Анчадан бери истеъмол қилмайман ҳам. Буни бировга маслаҳат ҳам бермайман. Ота-онам, яқинларим бу дардни курашиб, енга олишимни кўришларини истаيمان. Уларни ишончига яна қайта кирмоқчиман.

РИНИАТМ Тошкент филиалида даволанаётган бемор С. П

- Неччи йилдан бери гиёҳванд моддаларни истеъмол қиласиз?

- Ўн саккиз йилдан бери истеъмол қиламан. (киноя билан кулиб) Гиёҳванд моддалар рўйхатидаги деярли ҳаммасини татиб кўрганман.

- Ҳолатингиздан афсусда эмасдех кўринаяпсиз?

- Нега энди? Афсусдаман... кўп нарсамдан айрилдим. Шаҳар марказида бешта квартирам, BMW автомобилим бор эди, ҳаммасини сотдим. Жигарим ҳам панд берапти. Шунинг орқасидан гепатит С ни орттириб олдим.

- Оилангиз борми?

- Ҳа биринчи хотиним фарзандим билан Москвада яшайди. Иккинчи хотиним шу ерда. Москвада ҳам даволаниб келганман.

- Улар сизга қандай муносабатда?

- Бу жуда ёмон нарса. Хотиним доим жанжал чиқаради. Уйингизда ҳаловат бўлмайди. Ҳудо хоҳласа, бу ерда даволаниб, бу йўлга қайт яқинлашмайман.

- Москвада даволанганингиздан сўнг қайтиб истеъмол қилмадингизми?

- Қилдим.

- Бу ердан чиқиб яна истеъмол қилсангиз-чи?

- Йўқ, қилмайман. Чиққанимдан сўнг Вирусологияга бориб, жигаримни даволатаман. Бутун танамни тозалатиб, бу нарсага қайта кўл урмайман.

- Қувончни қаердан топасиз?

- Ҳаёт жуда зерикарли, баъзида қувонч йўқдек туюлади. Баъзида яна истеъмол қилгим келади.

Бугунги кунда “туз” номи билан оммалашган синтетик модда энг кўп истеъмол қилинапти. Айнан шу моддани истеъмол қилиш оқибатида ўзини юқоридан ташлаш, қўл томирларини кесиш, юқори тезликда автомобиль бошқариш каби ҳолатлар кузатилган. Бу ҳаракатларнинг ниҳояси аксар ҳолларда ўлим билан яқун топмоқда. Шунингдек, “туз” синтетик моддаси юрак инфаркти, мия инсультаи каби касалликларга

доялик ҳам қилади.

Бу инсонлар бир қарашда ОАВга қандай интервью беришни ўрганиб олгандек туюлади. Ҳозирги ҳолатидан мамнунлари ҳам, афсусланаётганлари ҳам бор. Улар қандай фикрда эканлигидан қатъи назар фақат зиён кўришди. Ҳаётининг энг мазмунли қисмини шифохонада даволаниш билан ўтказишмоқда. Тиббиёт марказининг коридори бўйлаб юрар эканман, шифокорнинг “онангни

қара тамом бўлди” деган гаплари қулогимизга чалинди... Ҳўнграб йиғлаётган онани кўриб, эса ич-этимиз эзилди. Амин бўлдик-ки, гиёҳвандлик одамнинг ўзи билан бирга, унинг ота-онаси ва яқинларининг ҳам умрини зулматга айлантиради. Ҳулоса ўзингиздан!

Миржалол МАҲКАМОВ
тайёрлади



Тадбиркорлар ва сармоядорлар диққатига!

“Ko'chmas mulk xizmatlarini ko'rsatish jamiyati” МЧЖ очик танлов савдоларига таклиф этади!

“Ko'chmas mulk xizmatlarini ko'rsatish jamiyati” МЧЖ томонидан ташкил этилган очик танлов савдоларига, “Чилонзор буюм савдо комплекси” АЖнинг 2023 йил 3 апрелдаги 45-сонли буюртманомасига асосан, қурилиши режалаштирилаётган савдо шохобчаларининг ижарага олиш ҳуқуқи қўйилмоқда:

1. “Чилонзор буюм савдо комплекси” АЖ ҳудудида жойлашган, савдо шохобчаларининг сони 7 дона, савдо шохобчаларнинг майдони – 12 м.кв.дан иборат, савдо шохобчаларининг ҳар бирининг бошланғич баҳоси 193 920 000 сўм.

2. “Чилонзор буюм савдо комплекси” АЖ ҳудудида жойлашган, савдо шохобчаси сони 1 дона, савдо шохобчанинг майдони – 18 м.кв.дан иборат, савдо шохобчасининг бошланғич баҳоси 181 800 000 сўм.

3. “Чилонзор буюм савдо комплекси” АЖ ҳудудида жойлашган, савдо шохобчасининг сони 1 дона, савдо шохобчанинг майдони – 35 м.кв.дан иборат, савдо шохобчасининг бошланғич баҳоси 123 725 000 сўм.

4. “Чилонзор буюм савдо комплекси” АЖ ҳудудида жойлашган, савдо шохобчаларининг сони 4 дона, савдо шохобчаларининг майдони – 35 м.кв.дан иборат, савдо шохобчаларининг ҳар бирининг бошланғич баҳоси 353 500 000 сўм.

5. “Чилонзор буюм савдо комплекси” АЖ ҳудудида жойлашган, савдо шохобчаси сони 1 дона, савдо шохобчанинг майдони – 42 м.кв.дан иборат, савдо шохобчасининг бошланғич баҳоси 148 500 000 сўм.

Савдода иштирок этиш истагини билдирган талабгорлардан аризалар ушбу хабарнома чоп этилган санадан бошлаб расмий иш кунлари соат 10:00 дан 16:00 гача қабул қилинади (13:00 дан 14:00 гача тушлик). Таклифларни қабул қилиш охириги мuddати 2023 йил 2 май куни соат 16:00да тўхтатилади.

Талабгорларнинг таклифлари 2023 йил 4 май куни соат 11:00дан бошлаб кўриб чиқилади. Энг юқори таклифни берган талабгор билан сотувчи ўртасида келишув битими тузилади.

Танлов савдо шу куни бўлиб ўтмаган тақдирда, такрорий савдолар 2023 йил 18,30 май, 8,19,28 июнь, 7,17,27 июль, 7,17,28 август, 7,18,27 сентябрь, кунлари сотилгунга қадар соат 11:00 да ўтказилади.

Савдода қатнашиш учун талабгорлар ёпиқ конвертда солинган таклифлари ва ариза билан биргаликда қуйидаги ҳужжатлар тақдим этади:

- юридик шахслар учун давлат рўйхатидан ўтказилганлиги тўғрисидаги гувоҳноманинг нусхаси;

- жисмоний шахслар учун СТИР ва паспортнинг нусхаси.

-Талабгорлар ижарага олиш ҳуқуқининг 50 фоизидан кам бўлмаган миқдордаги суммани закат сифатида “Ko'chmas mulk xizmatlarini ko'rsatish jamiyati” МЧЖнинг ХАТБ “DAVR BANK” Олмазор филиалидаги х/р: 20208000505331723021, МФО: 01121, СТИР: 308112732 га савдода иштирок этиш учун ариза топширгунга қадар тўлашлари шарт.

- Таклифи маъқул топилган талабгорга савдо ўтказилган кундан бошлаб 20 банк куни ичида сотувчи билан ижара шартномаси тузиш мажбурияти юклатилади.

Савдо ташкилотчиси жойлашган, савдолар ўтказиладиган ва савдода иштирок этиш учун аризалар қабул қилинадиган манзил: Тошкент шаҳри, Юнусобод тумани, Бодомзор йўли кўчаси, 33-уй. Телефон: (71) 237-23-91.

Тадбиркорлар ва сармоядорлар диққатига!
“Ko'chmas mulk xizmatlarini ko'rsatish jamiyati”
МЧЖ очик танлов савдоларига таклиф этади!

“Ko'chmas mulk xizmatlarini ko'rsatish jamiyati” МЧЖ томонидан ташкил этилган очик танлов савдоларига, “Чилонзор буюм савдо комплекси” АЖнинг 2023 йил 30 мартдаги 40-сонли такрорий буюртманомасига асосан, қурилиши режалаштирилаётган савдо шохобчаларининг ижарага олиш ҳуқуқи қўйилмоқда:

1. “Чилонзор буюм савдо комплекси” АЖ ҳудудида жойлашган, савдо шохобчаси сони- 1 дона, савдо шохобчанинг майдони — 350 м.кв.дан иборат, савдо шохобчасини бошланғич баҳоси 1 414 000 000 сўм.

2. “ Чилонзор буюм савдо комплекси” АЖ ҳудудида жойлашган, савдо шохобчаси сони-1 дона, савдо шохобчанинг майдони — 255 м.кв.дан иборат, савдо шохобчасининг бошланғич баҳоси 1 030 200 000 сўм.

3. “ Чилонзор буюм савдо комплекси” АЖ ҳудудида жойлашган, савдо шохобчасининг сони-2 дона, савдо шохобчаларининг майдони – 175 м.кв.дан иборат, савдо шохобчасининг ҳар бирининг бошланғич баҳоси 707 000 000 сўм.

4. “Чилонзор буюм савдо комплекси” АЖ ҳудудида жойлашган, савдо шохобча сони- 1 дона, савдо шохобчасининг майдони — 140 м.кв.дан иборат, савдо шохобчасининг бошланғич баҳоси 565 600 000 сўм.

5. “Чилонзор буюм савдо комплекси” АЖ ҳудудида жойлашган, савдо шохобчаси сони-1 дона, савдо шохобчанинг майдони — 150 м.кв.дан иборат, савдо шохобчасининг бошланғич баҳоси 606 000 000 сўм.

Савдода иштирок этиш истагини билдирган талабгорлардан аризалар ушбу хабарнома чоп этилган санадан бошлаб расмий иш кунлари соат 10:00 дан 16:00 гача қабул қилинади (13:00 дан 14:00 гача тушлик). Таклифларни қабул қилиш охириги мuddати 2023 йил 12 апрель куни соат 16:00да тўхтатилади.

Талабгорларнинг таклифлари 2023 йил 14 апрель куни соат 11:00дан бошлаб кўриб чиқилади. Энг юқори таклифни берган талабгор билан сотувчи ўртасида келишув битими тузилади.

Танлов савдо шу куни бўлиб ўтмаган тақдирда, такрорий савдолар 2023 йил 25 апрель, 4,15,24 май, 2,12,21 июнь, 3,13,24 июль, 3,14,24 август, 4,13,25 сентябрь, кунлари сотилгунга қадар соат 11:00 да ўтказилади.

Савдога қатнашиш учун талабгорлар ёпиқ конвертда солинган таклифлари ва ариза билан биргаликда қуйидаги ҳужжатлар тақдим этади:

- юридик шахслар учун давлат рўйхатидан ўтказилганлиги тўғрисидаги гувоҳноманинг нусхаси;

- жисмоний шахслар учун СТИР ва паспортнинг нусхаси.

- Талабгорлар ижарага олиш ҳуқуқининг 50 фоизидан кам бўлмаган миқдордаги суммани закат сифатида “Ko'chmas mulk xizmatlarini ko'rsatish jamiyati” МЧЖнинг ХАТБ “DAVR BANK” Олмазор филиалидаги х/р: 20208000505331723021, МФО: 01121, СТИР: 308112732 га савдода иштирок этиш учун ариза топширгунга қадар тўлашлари шарт.

-Таклифи маъқул топилган талабгорга савдо ўтказилган кундан бошлаб 20 банк куни ичида сотувчи билан ижара шартномаси тузиш мажбурияти юклатилади.

Савдо ташкилотчиси жойлашган, савдолар ўтказиладиган ва савдода иштирок этиш учун аризалар қабул қилинадиган манзил: Тошкент шаҳри, Юнусобод тумани, Бодомзор йўли кўчаси, 33-уй. Телефон: (71) 237-23-91.

«ИМКОН СУҒУРТА» АЖ Тошкент вилояти филиалига тегишли бўлган қуйида кўрсатилган полис бланкалар йўқолганини сабабли бекор қилинади.

ISR 0001805. ISR 0001806
ISR 0001810. ISR 0001811.

ISR: 0001807. 1SR 0001808.
ISR 0001812. ISR 0001813.
ISR 0001814.

МАРКАЗИЙ ОСИЁДА РЕКЛАМА

XIX аср охири Марказий Осиё ҳудудида Россия капитали ва ишлаб чиқариш маҳсулотларининг жалб этилиши, европача маданиятни мусулмонлар орасига кириб келиши, тадбиркорликнинг етакчи омили бўлган реклама санъатининг янги турларини шаклланишига туртки бўлди. Эндиликда реклама ижтимоий ҳаётнинг ажралмас қисмига айлана бошлади. Ижтимоий, сиёсий ҳамда тижорат рекламалари аҳамиятининг ортиши, уни янги ривожланиш босқичига кўтарди.

Реклама санъатининг узоқ ўтмишдаги оғзаки шаклдан ёзма шаклга келиши ҳам айнан кўрилаган даврга тўғри келади. XIX асрда ўлкада литография босмахона, фотография ательелари, доимий чоп этилган газета ва журналлар шу даврдаги тижорат ва ижтимоий рекламанинг шаклланиши ва жойларда фаол тарқалишига сабаб бўлди. XX аср газета ва журналлари, фото ва кино архивларида бир қанча реклама намуналари сақланиб қолган.

Рекламада биринчи мартаба фото санъатини қўлланилиши машҳур рассом-фотосуратчи Александр Родченко номи билан боғлиқ. У реклама мафкурасининг кишилар онгига кучлироқ таъсирини кўзлаб, ҳамда реклама плакатини янада жонлироқ бўлишига эришиш мақсадида биринчи мартаба машҳур

инсонлар фото суратини реклама плакатларида қўллаган.

Рекламанинг жамият ҳаётида қўлланилишида унинг яна бир воситаси бўлган кинематография санъатининг ўрни катта бўлди. Кинематографиянинг юртимиз маданий ҳаётига кириб келиши мазкур янги санъат тури орқали давр гоёларини кенг оммага етказишда ижобий натижалар берди. Эндиликда, ҳукуматнинг буюртмаси асосида бир қанча реклама фильмлари ва қисқа метражли реклама роликлари яратила бошланди. Бунга 1966 йил 12 январда Ўзбекистон Савдо вазирлиги тасдиқлаган «Одеваться модно и красиво» (режиссёр – А.Ёқубов) рангли реклама ролигини ишлаб чиқиш тўғрисидаги буйруғи, 1969 йилдаги «Хлопчатобумажные ткани Узбекистана» (режиссёр – А.Раҳмонов) рангли реклама кинофильми, 1972 йилда «Ўзбек-



фильм» киностудияси томонидан суратга олинган «Часовые огни» реклама роликлари (режиссёр – Д.Топилов) ҳамда «Союзторгреклама» ташкилотининг буюртмаси асосида тасвирга туширилган «Самарканд – город торговых» кинофильмлари мисол бўла олади. Маълумотларга кўра 1974 йилнинг ўзида бутун мамлакат бўйлаб тўрт юздан ортиқ реклама фильмлари яратилган.

TOSHKENT OQSHOMI МУАССИС: ТОШКЕНТ ШАҲАР ҲОКИМЛИГИ	Манзил: 100029, Тошкент шаҳри, Матбуотчилар кўчаси, 32	Телефонлар: Кабулхона (71) 233 61 10 Реклама (71) 233 28 95	2007 йил 19 январда Тошкент шаҳар Матбуот ва ахборот бошқармасида 02-001-раками билан рўйхатга олинган	Нашр учун масъул З. НАЗАРОВ	Топшириш вақти 00:55 Топширилди 05:00 Буюртма -	
	Бош муҳаррир Севдо Ниёзова	“NISO POLIGRAF” МЧЖ босмахонаси.	Манзил: Тошкент вилояти, Ўрта Чирчиқ тумани, “Машъал” маҳалласи, Марказий кўчаси, 1-уй	Ҳажми — 2 босма табоқ, офсет усулида босилди. Адади 500 нусха, қоғоз бичими А3	Газета тахририят компьютер марказида саҳифаланди	